

中國方志叢書·東北地方·第十號

據

民國·趙恭寅，曾有翼纂
民國六年鉛印本

影印

遼寧省

瀋陽縣志



成文出版社有限公司印行



10094028

民國六年八月

瀋陽縣志

三多



新加坡
PDG

瀋陽縣志書序

瀋陽趙令恭寅重修縣志既成進其書於余余謂若趙令者可謂知本矣夫知事身率百里錢穀獄訟農桑教育皆所有事也此欲泛應而曲當亦顧其摻術何如耳余嘗觀西人之治事下至一公司一會議無不有其歷史其紀載俾後謀興革者審其利弊之所因若夫一邑之大其羣治嬗變孰與一公司一會議之事而從政者多略焉無怪乎日言求治而不可得也瀋陽於古爲邊徼宋明以前紀載弗詳有清肇興制作彌備光緒末葉詔天下自治一時州志縣志哀然成書瀋陽志書之成自茲始顧其時省制初變新政甫行風氣尙未甚開地利猶未大闢以視今日特陳迹而已夫奉省在全國中居特別地位而瀋陽爲省治所在尤在全省中居特別地位者也凡百興舉小之爲一縣之休戚大則係全國之安危將欲審悉利弊以爲異日興革之標準前無作者後之人將誰述乎趙令注意及此就原書修而全之

調查編校兩歷寒暑而始其事於數年來羣治蛻化之實象猶示之掌焉所謂知本者非歟
故余於其書之成也樂爲弁誌數言並用規於今之從政者

民國五年十月奉天督軍兼署省長張作霖

瀋陽縣志序

修志非易事也考志所自昉始於成周周禮小史外史掌邦國四方之志歷代相因國史而外則有省志下至郡縣亦莫不有志其例則史漢成軌其事則天人並貫且必具才學識三長始克酌準古今網羅萬有誠憂憂乎其難矣瀋陽爲勝朝王室所基比於古之南陽豐沛迄今三百年虞賓在位文物猶新盛京通志修於乾隆旣嫌舊遠而縣志更付闕如夫此邦舊爲陪都今爲重鎮典章沿革愈變愈通忍聽其湮沒不傳乎梁嘗有志於此徵文獻考古迹妄有奉天新志之議自愧學識淺陋踈跼十年未遑卒業適趙知事恭寅纂修縣志脫稿見示繙誦之餘欣喜過望竊以爲作縣志須別於省志有省志亦詳者縣志則宜略有省志從略者縣志則宜詳今觀其書部列十五卷退輯故聞近徵新制條理不紊詳略適宜其文純而不駁其事言而足徵誠有合於史例向非賴諸君子其才學與識元元窮年烏能考

訂精詳莫羅宏富蔚然成茲鉅製耶梁既獲先覩爲快且每歎作志之難而斯書之成獨完
備如是洵足信今而傳後矣是爲序

奉天政務廳長金梁

重修瀋陽縣志序

周官土訓掌地圖以詔地事誦訓掌方志以詔觀事以知地俗蓋邦國四方之志於是權輿降及後世惟國史頗立專官而郡縣圖志僅以付地方有司有司而賢則間數歲一舉其不賢則累數十歲或百歲而未嘗一舉夫一方之紀載苟歷數歲矣則其間政教之興替禮俗之隆污典章文物之因革損益要不能無所異同況於世界棣通之後塗軌四達日去故而就新舉凡勅法興教阜財惠工諸大政方且與時推移紛紜繁瑣而未有已積今一歲之事所倍稱於昔之數十百歲者寧可勝量於以條而理之廣續而附益之使隨者以密而闕者以完庸詎非賢有司之責乎瀋陽故無縣志光緒戊申都君林布始創爲之洎宣統庚戌金君正元繼加修訂乃閱時未久而寅生知事復於從政之暇聚邑之賢士大夫取近年事蹟諸未絕先所撰述者及僅文蕪蕪之待刪削者蒐討纂次都爲十五卷校書有日以同序於

厚惟厚忝以道尹承乏遼瀋於茲三年矣巡覽二十二縣嘗欲條其風俗慨然慕朱贛之爲人顧人事牽率卒未暇又以關塞近鄙多質少文公私故籍皆無足徵往往千里間求一舊志而不可得思與二三賢有司搜攬遺文斐然有作每愧於無可藉手今瀋陽以首治獨開其先吾知異時他邑必有繼起而踵武者然則茲編之成豈唯備一隅之故實昭典訓於方來夫亦倡導是邦之人使咸有述也故樂爲之序書以遺之所以嘉勉寅生亦欲凡爲有司者知共勉云

民國六年二月遼瀋道尹榮厚

志於史爲別子體例視馬班八書十志爲近大都以田賦戶口地理職官藝文食貨等分門別類最錄成篇孔子謂文獻足則吾能徵蓋一代之文獻視乎史一方之文獻視乎志志於史顧不重哉漢以前圖書典籍掌於太史世爲專官其紀一方之文獻者絕少志乘之作其始於郡縣之世乎然唐以前亦無有也自唐末梁載言始撰十道志十三卷晁公武讀書記亟稱之唐宰相李吉甫撰元和郡縣志四十卷篇首皆有圖爲後世各省通志之濫觴則是而後宋談鑰撰吳興志二十卷范石湖撰吳郡志五十卷又後世府志之濫觴也縣志之作始於宋嘉定中永嘉蔡範甫撰黃岩志十六卷歷陽李瞻撰旌川志八卷濡須王林撰涇川志十三卷其體例或詳或畧馬氏經籍攷存其目而書沒不傳卽傳亦未必可觀惟是公武盛推宋敏求東京記上中下三卷攷証開封坊巷寺觀官廨私第採極精博陳直齋書錄解題又謂周濬撰臨安志十五卷於行在宮闈殿閣全不記載頗病疏畧二書之去取固因

詳畧之不同然近世有名之作如武功介休二志皆彰彰在人耳目者有識之士亦復深致不滿蓋文體修潔與事實詳備二者不能並顧曠志乘之難爲也久矣瀋陽於古屬前懷地唐景雲中始置瀋州元設瀋陽路明改瀋陽衛清初設承德縣今改瀋陽縣名從其剏改之誠是也惟前清因幽岐舊土尊爲陪都設將軍府尹五部侍郎體制視各行省差不同故當時僅有通志無縣志通志成於乾隆中葉其時海外交通尙未大盛今則時移勢易矣一代之人文政策恆視世變爲轉移昔之神區奧輿一變而爲中外綰轂鷹麟虎視之場此又吾鄉鉅人長德所不料也瀋陽縣志初創於前知承德縣事都君林布繼成於知縣事金君正元今瀋陽縣知事趙君恭寅復修之八年之間凡三易稿在諸君子勤於職事有足多者第恐人事倥傯采或有未備尙望後之君子以時纂輯庶獲宋次道精博之譽毋遺周彥廣疏略之譏斯可矣書成趙君持以問序因爲之撰拾舊聞綴於簡末云

中華民國五年十月邑人王樹翰敬識



重修瀋陽縣志序

志書者史之一體也周禮大司徒掌天下土地之圖小史外史掌邦國四方之志其來尙矣漢司馬遷作史記以紀傳表分爲八書班固易書爲志後世因之以紀時政實兼紀傳表之長而爲一體上自天文下迄地理中及人事靡不備具視史尤爲加詳歷代官書所載一統有志一省有志至於一郡一邑亦莫不有志顧志天下者略於省志一省者略於郡志一郡者略於州縣其體例然也夫自郡以上漸不及詳而縣苟無志則所謂天文地理人事之在一方者將何所藉以傳志之不可已也如此夫瀋陽爲古遼徼自唐以來始著方冊元明而後漸成重鎮清室崛起遂爲帝王之都比於周之豐鎬迄今三百年來城郭之廢興河渠之遷徙戶口貢賦之增減官制員司之裁復司法議會之創立兵防學校之建置以及循吏蓋臣節義人文之後先煌煌美載筆闕如文獻莫徵蓋縣志之失修久矣光緒戊申前令都公林

布攝篆承德以部令咨取郡縣志書始延賓編輯書成未鋟而都公已以膺荐推升繼任者爲金公正元金公本爲邑人又臨斯土取都公已成之稿重加潤色付諸手民而濬陽始有縣志顧原書採蒐簡略節目疎闕又以剗剗恹恹櫟屑漏帝虎魯魚所在多有讀者病之民國元年恭寅來宰是邑覩其叢殘斐然欲作獨以經費支絀挹注無方延至乙卯二月始得以捐稅之羨餘爲修書之資用於是關聘本邑耆紳宿儒以任其事時衆議院議員曾君子敬適在籍遂公推爲總纂錫聘之孫鼎臣世仁甫三太史榮孟枚關果忱王希哲張仙舫諸先生分任校閱之勞越歲七月屬稿既定質之諸君僉曰其文直其事覈實而不俚信而足徵可以言志矣吾邑賴以不朽者其在茲乎刻成諸君復以弁言爲請因泚筆述其崖略如此

中華民國五年七月濬陽縣知事趙恭寅

瀋陽縣志

例言

一瀋陽縣志嚮無成書清光緒末葉都公林布篆承德時始與邑紳從事編輯金公正元繼任就原書付梓分爲上下二編是爲瀋陽志書之嚆矢茲編雖多採舊志而先後增減分合詳略與舊志稍有異同

一瀋陽縣爲奉天首邑與他縣所處地位不同縣署出治之所卽軍民兩府出治之所管轄權限苦難分明茲編雖係縣志而省城軍民兩署及司法交涉財政各署局場所皆列入建置門內藉存沿革其政與事則不及焉以免繁素而符體例

一舊志首崇陵寢宮殿綴以頌詞今者國體雖更仍應恭列地理門內以誌欽仰

一舊志撰於前清光緒戊申年其間文獻之徵皆採之於盛京通志然自乾隆以迄光緒中

經百數十年土地名物古今互異人物一項尤多闕佚茲編以舊志有可據者從古無可據者從今傳信傳疑不加附會人物禮俗悉訪之鄉宦耆老確有可憑者詳慎採入

一本編圖繪凡山脉河流各區分劃警區學校礦產鐵路皆以號表標明以便省覽

一志書體例概宜紀實政教沿革新舊每多不同例如教育警察司法交通宗教諸目均爲舊志所無本編不標新以立異不泥古以畧今據事直書斬於微實而已

一志書舊例目錄平列今政治日新人事日繁只列平目有眉目不清之嘆茲爲總目十五總目之下各爲分目若干庶事有統攝語有綱領

發凡

縣境據全省之中權幅員廣袤萬六千餘方里田畝租稅百有餘萬地固足以自守財亦足以集事是固爲治者首宜稽考者也述地理一

設官分職所以爲民治尙張弛代有沿革晚近吏治分更簿領填委求一承奉上官勉符功令已足爲賢能吏而於民間疾苦治道得失鮮察及焉然一命之士苟存心愛物於人必有所濟矧官本親民輔治有佐興利除弊靖暴安良閭閻安危皆係焉矣述職官二

庶而後富聖人施政之次第本縣戶口亦清時二百餘年之休養生息始有此八十餘萬之繁庶庚子之亂日俄之戰民物凋敝盜賊橫行於是警察保衛先後舉行警察沿團練之舊規保衛爲預警之蛇化種種設施無非爲保生命保財產之計述民治三

泮宮不作魯道衰衰學舍荒蕪鞠爲茂草蓋科舉既停而絃誦輟響者久矣清室維新首重